

# Robidog



**Texscht : Mike Sutter**  
**Musig : Mike Sutter**

**Amne Sunntig Morge bi ni chürzlech go schpaziere  
ha mi erfröit ab au däm was d'Natur tuet inszeniere  
ä früeligfrüsche Duft  
ir klare reine Luft  
paar Wüwchli wo dr Himu tüe verziere**

**linggs äs munters Bechli, wo plätscheret im Bett  
rächts ä grüeni Matte mit gäub u violett  
u hingedra ä Hecke  
wo d'Hase sech verschtecke  
u d'Vögu singe i de Böim um d'Wett**

**Während sich mi Geischt vouer Fröid drmit befasst  
au die wunderbare Idrück z'würdige erfasst  
näbem Wägesrand  
mis Oug ä Gägeschand  
wo irgendwie nid rächt is Gsamtbuid passt**

**Dr Gägestand am Wägesrand isch gnöjer gluegt äs Seckli  
äs chliises bruuns us Plastig zumne ganz bestimmte Zwäckli  
bim Robidog erworbe  
dient es zum entsorge  
vom Mönch sim beschte Fründ sim früsche Dräckli**

**Das Seckli macht dr Aschiin, fasch eso aus wär  
s'nid vo lei do härecho u no nid lang isch's här  
ha nid gross müesse rote  
dass obedruff dä Chnote  
bedütet s'isch aus angere aus läär**

**D'Idee vom Robidog isch simpu me müesst nochecho  
doch irgendwie - äs muess so si - git's Hundehauter wo  
wie sech's ghört sech bücke  
das Hüüfeli tüe pflücke  
doch nächär löh lo ligge eifach so**

**I sueche nach em töifer Sinn vo sore Aktion  
Was isch somne Hundefründ si Inschpiration  
und muess fasch dr Schluss zieh  
s'git offesichtlech Lüt die  
betrachte das aus Dekoration**

Oder vilech meine si äs loufi eine zueche  
und erblickt ä sones Seckli unger äre Bueche  
är fröit sech ungemain  
u dänkt ha ni nes Schwein  
wie anger Lüt wo Piuze gö go sueche

Das Seckli uf em Bode macht mi vei echlei z'schudiere  
s'chönnti si dass d'Wüesseschaft tuet experimäntiere  
dass me sech überleit  
öb's ohni z'gfrüre geit  
Hundsschissdräck für d'Nachwäut z'konserviere

Oder aber äsi isch eine, wo's eifach nid hett chönne  
wo's röit das gfröite Schissli via Robidog z'verbrönne  
wo's liebevou beschützt  
indäm är s'Seckli nützt  
wüü är's nid mou de Flöige mögti gönne

Sig's wie's wöu das Seckli, hett mir irritiert  
Däm Hundefründ u mis Inträsses dünkt mi - divergiert  
s'isch nid a mir z'entscheide  
wele vo üs beide  
hett irgendöppis vöuig lätz kapiert